

PŪGIŌ BRŪTĪ

A CRIME STORY IN EASY LATIN

BY

DANIEL PETTERSSON
AMELIE ROSENGREN

LATINITIUM.COM

INDEX RĒRUM

Acknowledgements.....	iii
Preface	vii
Persōnae	x
Prologus	xiii
Capitulum primum	xv
Capitulum secundum.....	xvii
Capitulum tertium	xx
Capitulum quārtum	xxii
Capitulum quīntum	xxiv
Capitulum sextum	xxvii
Capitulum septimum	xxix
Capitulum octāvum	xxxi
Capitulum nōnum	xxxiii
Capitulum decimum	xxxv
Capitulum ūndecimum	xxxvii
Capitulum duodecimum.....	xl

Capitulum tertium decimum	xlii
Capitulum quārtum decimum	xlv
Capitulum quīntum decimum.....	xlvii
Capitulum sextum decimum	l
Capitulum septimum decimum	liii
Capitulum duodēvicēsimum	lyi
Capitulum ūndēvicēsimum	lix
Capitulumvicēsimum	lxi
Capitulum ūnum et vicēsimum	lxiv
Capitulum alterum et vicēsimum	lxvi
Capitulum tertium et vicēsimum	lxix
Capitulum quārtum et vicēsimum	lxxi
Capitulum quīntum et vicēsimum	lxxiii
Capitulum sextum et vicēsimum	lxxvi
Capitulum septimum et vicēsimum	lxxviii
Capitulum duodētricēsimum	lxxx
List of abbreviations	lxxxii
Vocabulary	lxxxiii



PERSŌNAE



TERENTIA



P. TERENTIUS AËTIUS, PATER
TERENTIAE



DŌRIPPA, ANCILLA TERENTIAE




OENEUS, CAUPŌ



MINISTER CAUPŌNAE



Q. CLŌDIUS CRĒSCĒNS



URSULA, ANCILLA CLŌDIĪ




MENDĪCUS



ADULĒSCĒNS



C. BOMBIUS PARVUS



1. VIA AURĒLIA 2. TĪBERIS 3. PŌNS AEMILIUS 4. STABILUM 5. DOMUS CLŌDII 6. PORTA FLŪMENTĀNA
7. ASINA CAUPŌNA 8. FORUM RŌMĀNUM 9. SUBŪRA 10. DOMUS TERENTIĪ 11. DOMUS AUGUSTĪ
12. CIRCUS MAXIMUS 13. PORTA CAPĒNA 14. VIA APPIA.

PROLOGUS

SŌL LŪCĒBAT. TERENTIA iānuam post sē clausit et patrem intuita est, quī in lectō iacēbat. Tum ad eum accessit et manum eius prehendit. Pallida erat.

Terentius filiam intuēns, “Tempus est mē,” inquit, “Terentia, abīre. Doleō quod tibi nōn multum relinquo. Dīvitēs ōlim fuimus! Meministīne?”

Terentia patrī respondit: “Meminī, ō pater, sed tibi dormiendum est.”

Tum Terentius, “Mea filia,” inquit, “audi: Ante mē sunt tenebrae. Mox moriar.”

“Ō pater!” exclāmāvit Terentia.

“Audi,” inquit Terentius, “est quod tibi nārrem.”

Terentia iuxtā eum cōnsēdit.

Tum pater, “Audi,” inquit, “mea Terentia, prope omnia

nostra—aurum, equōs, alia multa—ūnus homō nōbīs abstulit. Prope nihil aliud iam habeō quam hoc. Prope nihil aliud mihi restat quod tibi dem.”

Pater pūgiōnem in manū Terentiae posuit et, “Hic pūgiō,” inquit, “Brūtī fuisse dīcitur. Hic est ille pūgiō quō Iūlium Caesarem ōlim percussit. Tē volō hunc pūgiōnem habēre. Hic enim pūgiō tē dūcet ad...”

Terentius subitō tacuit.

“Pater?” exclāmāvit Terentia. “Pater?! Respondē! Quō mē dūcet? Pater?!”

Terentius oculōs clausit. Mortuus est.

Terentia pūgiōnem manibus tenēbat. Dum patris pūgiōnem prae sē tenet, “Per hunc,” inquit, “pūgiōnem iūrō, pater: Nostra recuperābō!”



CAPITULUM PRĪMUM

TERENTIA CURRĒBAT. NOX Rōmae erat et Terentia per obscūrās urbis viās currēbat. Celeriter currēbat. Ante sē umbram vidēbat. Eam sequēbātur. Sed umbra celerius currēbat quam Terentia.

Terentia subitō cōstitit. Via erat vacua et obscūra. Nōn vidēbat umbram quam sequēbātur. Irāta exclāmāvit: “Ubi es?!”

Terentia currere volēbat, umbram sequī volēbat. Sed urbs et via nimis obscūrae erant.

Terentia circumspexit. Viās et aedēs vidēbat, sed obscūrae erant. Umbrās vidēbat, multās umbrās, sed umbra quam sequēbātur iam nōn vidēbat.

Nox erat obscūra. Periculōsum erat noctū Rōmae foris esse; Terentia erat sōla et via erat vacua.

Terentia conversa rediit eādē viā quā vēnerat. Ad

caupōnam rediit ē quā tam celeriter paulō ante abierat.

Parvam caupōnae iānuam paulisper intuita est. Iānuā rubra erat. Nōmen caupōnae erat 'Asina', in quā erant lūmen et calor et multī hominēs. In viā erant tenebrae et frīgus et nūllī hominēs. Terentia sōla erat.

CAPITULUM SECUNDUM

TERENTIA AB OBSCŪRĀ viā abiit et caupōnam intrāvit.

Ad ministrum caupōnae accessit et ita locūta est:

"Salvē. Adulēscēns modo hīc fuit."

"Fuit," respondit minister.

"Ex hāc caupōnā," inquit Terentia, "fūgit."

"Fūgit," respondit.

Terentia perrēxit ita rogāre: "Scīsne quis ille sit?"

"Sciō." inquit minister caupōnae. Tum Terentia subīrāta, "Age," inquit, "dīc, quis tandem est?"

Hīc vir cum ānulīs aureīs ad Terentiam accessit et, "Latīnē," inquit, "ille nōn intellegit. Graecus est."

"Ain' tū?" inquit Terentia. "Nunc intellegō cūr ita mihi responderit! Latīnē loquī nescit!"

Tum vir cum ānulīs aureīs, "Ita est," inquit. "Oeneus sum,

caupō sum et haec est mea caupōna! Quid vīs? Vīsne vīnum?
Habēmus multa vīna et ea bona! Prōme nummōs.”

“Vīnum,” inquit Terentia, “nōlō. Audī, adulēscēntem quaerō
quī ex hāc caupōnā modo fūgit. Eum fortasse vīdistī?”

“Quid?” inquit caupō. “Tē nōn iam vult?”

Terentia irāta caupōnem intuita est.

“Adulēscēntem,” inquit, “ex hāc caupōnā fugientem secūta
sum. Vīdistīne eum?”

“Fortasse,” inquit Oeneus, “eum vīdī. Sed quid tum? Cūr
eum quaeris?”

Cui Terentia, “Aliquid,” inquit, “mihi abstulit.”

Vir cum anulīs aureīs subrīsīt tum ita locūtus est: “Ain’ tū?
Abstulit? Quid tibi abstulit?”

“Pūgiōnem,” inquit Terentia, “mihi abstulit.”

Tum ille: “Pūgiōnemne tuum? Mēcum sī vēneris, alium
tibi dabō; multōs habeō.”

“Nōn tuum,” inquit, “sed meum pūgiōnem volō.”

Tum ille: “Cūr eum tibi abstulit?”

Terentia subīrāta respondit: “Quī sciam? Nōn fuit tempus
eum tum rogāre! Sed heus, dīc mihi, adulēscēntem quī pūgiō-
nem mihi abstulit, nōstīn’?”

“Nōn,” inquit caupō, “nōvī.”

“Vīderāsne,” inquit Terentia, “eum ante?”

Respondit ille: “Saepe vīdī.”

Tum illa: “Quā est faciē?”

Caupō Terentiam intuēns, “Quid?” inquit, “Nescīs quā
faciē sit? Nōnne eum forās secūta es?”

“Sum secūta,” respondit, “sed quā faciē esset in tenebrīs
vidēre nōn potuī.”

Tum caupō, “Age,” inquit, “quae sciō, tibi dīcam: Ille quem

quaeris adulēscēns est pulcher capillō nigrō, immō pulcher-
rimus, et parvīs est manibus.”

“Geritne,” rogāvit Terentia, “anulōs aureōs, ut tū?”

“Anulōs,” respondit, “nōn gerit, quod sciam.”

“Quis,” inquit Terentia, “eum nōvit? Sī saepe hīc fuit, ut
dīxistī, fortasse aliquis eum nōvit. Soletne aliquis hīc cum
eō loquī?”

Caupō scelestō similis subrīsīt.

“Nōn,” inquit, “sed sī virum capillō nigrō vīs, ecce mē.”

Tum Terentia irāta, “Quid tandem?” inquit, “Tūne habeō
pūgiōnem meum?”

“Nōn pūgiōnem,” respondit caupō, “sed aliquid melius
habeō...” Et gradum magnum ad eam fēcīt.

Terentia ē caupōnā fūgit. Neque eō redīre cōgitābat: Noctū
Rōmae nōn tantum viae sed etiam caupōnae periculōsae erant.



CAPITULUM TERTIUM

TERENTIA VIIS OBSCŪRĪS et vacuīs domum celeriter ibat. Periculōsum erat noctū forīs esse, neque sine ancillā suā forīs esse debēbat. Terentia cum ancillā suā in caupōnā fuerat, sed ubi ancilla iam esset nesciēbat.

Cum domum tandem rediisset, sēcum paulisper cōgitāvit: *Quōmodo pūgiōnem recuperem? Umbram sōlam adulēscēntis vīdī. Tantum est.*

Adulēscēntem autem esse pulchrum, capillō nigrō, parvīs manibus sciēbat. Haec omnia ille caupō nārrāverat sed Terentiam nōn multum adiuvābant.

Terentia domī diū sedēbat cum eī in mentem vēnit esse vīnum super tunicam suam! Nesciēbat essetne ancilla domī, sed surrēxit et, dum tunicam exuit, clāmāvit:

“Dōrippa! Tunica mea maculās vīnī habet! Accēde hūc!”

Dōrippa, ancilla eius, in conclāve celeriter vēnit et tunicam sūmpsit; abibat cum Terentia “Dōrippa,” clāmāvit, “manē! Ē caupōnā ēgressa quō abiistī?”

Ad hoc Dōrippa ancilla, “Ubi ē caupōnā,” inquit, “ēgressa es, tē secūta sum, sed celerius cucurristī quam ego; post trēs viās tē nōn iam vidēbam. Paulō diūtius cucurrī sed omnēs viae vacuae erant. Cum nusquam tē vidērem, domum redīi. Male fēcī?”

“Immō,” respondit Terentia, “rēctē fēcistī. Noctū enim periculōsum est forīs esse.”

Dōrippa rogāvit: “Cūr ē caupōnā tam subitō ēgressa es?”

“Nōnne,” inquit Terentia, “vidistī adulēscēntem quī forās ē caupōnā fūgit?”

“Eum,” respondit, “nōn vīdī. Illud sōlum vīdī vīnum tibi super tunicam effundī. Tum cucurristī. Tantum est.”

“Adulēscēns,” inquit Terentia, “mihi abstulit pūgiōnem quī in mēnsā iacēbat; itaque eum secūta sum.”

Ad hoc Dōrippa: “Prehendistīne eum?”

“Nōnprehendī, quod celerius cucurrit quam ego.”

Tum Dōrippa: “Male nārrās. Numquid vīs?”

“Ut mihi tunicam,” inquit Terentia, “pūram afferās.”

Dōrippa conversa abiit.

Paulō post Terentia dormītum iit sed dormire nōn poterat. Etiam irāta erat. Nesciēbat enim quōmodo pūgiōnem patris recuperāret. Cōgitābat sēcum: *Nihil nōn faciam ut patris dōnum recuperem; id per oculōs iūrō!*

CAPITULUM QUARTUM

PROXIMUS DIĒS LŪMEN et calōrem attulit. Terentia nocte nōn dormīverat. Nocte oculōs nōn clauserat. Dē lectō surrēxit et pūram tunicam induit. Flāvās aut rubrās tunicās gerere solēbat sed illō diē candidam sūmpsit. Ancillā domī relictā Terentia forās ēgressa est. Circumspexit: Via iam erat plēna hominum.


Quamquam nōlēbat, ad caupōnam in quā proximā nocte fuerat rediit. Ad caupōnam vēnit, ad iānuam accessit, sed nōn intrāvit: Caupōnem, hominem scelestum cum ānulīs aureīs, rūrsus vidēre nōlēbat. Itaque ā caupōnā statim abiit et perrēxit eādē viā quā umbram proximā nocte secūta erat. Volēbat aliquid reperīre quod ad scelestum adulēscēntem, quī pūgiōnem abstulerat, dūceret. Via autem illō diē alia esse vidēbātur quam ea quā nocte proximā cucurrerat. Tam

multī erant hominēs ut Terentia viam et aedēs vix vidēret. Tandem eō vēnit ubi proximā nocte cōnstiterat. Terentia circumspexit: Erat via aliīs viīs similis.

Viam ingressa est, sed nesciēbat quō īret. Ūnam ē portīs urbis praeteriit; Porta Flūmentāna erat. Nōn longē ab eā Tiberim vidēre poterat, sed ē portā nōn est ēgressa. Perrēxit. Subitō mediā viā cōnstitit. Duo enim magnī equī eādē viā ībant. Terentiam praeteriērunt et aliam viam ingressī sunt. Terentia equōs oculīs secūta est.

Nesciēbat quō īret. Nesciēbat ubi adulēscēntem scelestum quaereret.

Oculōs apertōs tenēre vix poterat. Circumspexit ubi sedēret. Iuxtā eam stābat raeda vacua. In raedā cōnsēdit. Nōn multō post Terentia in raedā dormiēbat. Sōle lūcente dormiēbat quasi plēna nox esset.



CAPITULUM QUINTUM

RAEDA IN QUĀ Terentia sedēbat viā longā celeriter ibat. Terentiā iam dormiente raeda abibat et post longum tempus ad aedēs obscurās vēnit. Equī raedam cum Terentiā in aedēs trāxerunt.

Multō post Terentia sonitū excitāta est; ad hunc sonitum oculōs aperuit. Circumspexit. In conclāvī obscurō et tacitō erat. Nihil in tantīs tenebrīs vidēre poterat. Nōn placēbat; sciēbat enim Rōmam periculōsām esse. Sic pater dixerat.

Nōn sōlem, nōn viam hominum plēnam, tenebrās sōlās ante sē iam vidēbat. Nōn placēbat.

In raedā etiam sedēbat sed ubi esset nesciēbat. Tum sonitum, quō paulō ante excitāta erat, rursus audivit.

Aliquis eam intuēbatur, sed in tantīs tenebrīs, quis esset, Terentia nōn vidēbat, sed sciēbat aliquem ante sē stāre et sē

intuērī.

“Heus,” inquit Terentia, “quis es? Cūr mē intuēris?”

Nēmō respondit Terentiae clāmanti.

“Heus!” inquit Terentia, “Adiuvā mē, rogō tē! Nesciō ubi sim! Abire volō!”

Clāmanti Terentiae nēmō respondit; Terentia sonitum accēdentis per tenebrās iam audiēbat.

Terentia iam tam pallida erat quam tunica quam gerēbat. Sonitum rursus audivit. Iam aliquis nōn longē ab eā stābat.

“Adiuvā mē, rogō tē! Volō domum redire!”

Subitō ante sē duōs oculōs vidit. Tam magnī erant ut etiam in tenebrīs cōspicerentur. Oculī similēs sōlibus in tenebrīs lūcēbant.

“AAAAAAAH!” exclāmavit Terentia.

Iānuā post Terentiam subitō aperta est. Sōl forīs lūcēbat. Terentia iam vidēbat. Ante eam stābat asinus.

Terentia tacuit.

Homō magnā barbā conclāve celeriter intrāvit et subridēns, “Hic est Lūcius,” inquit, “asinus meus optimus, immō aureus.”

“Quid? Quid nārrās?” inquit Terentia.


Vir magnā barbā, “Bene,” inquit, “dormivisti? In raedā enim meā sedēns dormivisti. Tē ante excitāre nōluī, sed nunc mihi raedā opus est. Haec enim raeda Lutetiam mox ibit, itaque tibi dēscendendum est.”

Terentia ē raedā dēscendit. Ē conclāvī obscurō ēgressa in sōlem vēnit. Tum intellēxit ubi esset: equōs, asinōs, raedās vidēbat. Stabulum erat.

Terentia paulisper venientēs et euntēs oculīs secūta est. Erat stabulum plēnum equōrum et raedarum. Hūc multī veniēbant hominēs: aliī ut ad urbem aliam raedā irent, aliī

ut dōna ad aliam urbem mitterent. Terentia quoque ad aliam urbem ire volēbat. Cōgitābat sēcum: *Athēnās, Alexandriam, Lutetiam, ante omnia Londinium ire volō, ibi enim hominēs nōn scelestī sed bonī sunt, et barbam habent. Id pater olim dixit. Pater numquam errat.*

Barbae Terentiae placēbant.



CAPITULUM SEXTUM

TERENTIA, CUM LŪCIUM asinum paulisper intuita esset, perrēxit. Dē pūgiōne ablātō rŭrsus cōgitābat: Nesciēbat quid faceret, sed aliquid faciendum esse sciēbat.

Subitō mediā viā cōstitit. Iānuam iuxtā stabulum cōspexit. Parva erat. Rubra erat. Sēcum ita cōgitābat: *Ubi hanc iānuam rubram ante vidī?*

Tum intellēxit sē ibi olim fuisse cum patre. Pater Terentiae cum brevī virō ibi locūtus erat. Ūna enim ē patris ancillīs fūgerat: Pater ad virum brevem cum Terentiā filiā statim ierat et hominem brevem rogāverat ut ancillam sibi reperiret. Terentia nihil aliud dē hāc rē sciēbat.

Illīs temporibus tam multās ancillās habuerant, sed nunc homō scelestus prope omnēs habēbat. Dōrippa sōla

iam restābat.

Terentia ante iānuam rubram paulisper tacita stetit. Tum manum eī imposuit. Iānuā apertā intrāvit.

Post iānuam erant tenebrae. Terentia in parvō conclāvī obscūrō iam stābat. Conclāve erat rubrum. Ante Terentiam erat alia iānuā et iuxtā eam etiam aliae iānuae. Subitō ūna ex iīs aperta est et parva fēmina conclāve intrāvit. Ad Terentiam accessit et tacita eam diū intuita est.

“Salvē,” inquit Terentia.

Tum Ursula—hoc enim nōmen fēminae fuit—rogāvit: “Quid? Vīn’ Clōdium vidēre?”

Terentia nesciēbat quis Clōdus esset sed intellēxit eundem esse debēre quī patrem multō ante adiūvisset.

“Volō,” respondit Terentia.

“Eī,” inquit Ursula, “nōn est tempus.”

Fēmina parva in Terentiam suspexit.

“Exspectāre,” inquit Terentia, “possum. Scīsne quam diū exspectandum sit?”

Subīrāta, “Nōn,” inquit fēmina.

Fēmina parva Terentiam diū intuita est, tum tacita abiit. Mox in conclāve rediit cum sellā quam ante Terentiam posuit.

Tum, “Hīc,” inquit, “cōnsīde.”

Terentia in sellā tacita cōnsēdit. Fēmina rūrsus abiit.

CAPITULUM SEPTIMUM

TERENTIA IN PARVĀ sellā in conclāvī obscūrō et rubrō diū sēdit. Subitō ūnā ē iānuīs apertā vir longus magnā barbā intrāvit. Terentia subrīdēns sēcum cōgitāvit illum magnā barbā pulchrum esse. Vir magnā barbā Terentiam in tenebrīs sedentem nōn vīdit, sed statim accessit ad iānuam quae forās ferēbat, quā apertā ēgressus est. Irātus esse vidēbātur.

“Heus!”

Aliquis post eam stābat. Terentia caput convertit. Post eam vir brevis magnō ventre stābat. Neque capillōs in capite neque barbam in faciē habēbat.

Subrīdēns, “Salvē,” inquit Terentia.

“Salvē,” respondit vir magnō ventre.

“Mīhi nōmen,” inquit, “est Terentia; potesne mē adiuvāre?”

“Fortasse. Mihi nōmen est Clōdius,” inquit vir brevis.
“Sequere mē et nārrā mihi rem omnem.”

Clōdius Terentiam in proximum conclāve, quod erat flāvum, sēcum dūxit.

“Cōnsīde,” inquit Clōdius.

Terentia in ūnā ē sellis rubrīs cōnsēdit.

Clōdius rogāvit Terentiam: “Vīsne quod bibās?”

“Volō,” inquit Terentia, “vīnum, sī habēs.”

Clōdius ē conclāvī ēgressus ad aliud conclāve iit et iānuam quā fēmina paulō ante abierat aperuit. Aliquid fēminae dixit, tum ad Terentiam rediit. Cōnsēdit in ūnā ē sellis et Terentiam intuēns rogāvit: “Age dīc, in quā rē tē adiuvāre possum?”

“Pūgiō,” inquit Terentia, “mihi ablātus est; eum recuperāre volō.”

“Cūr putās mē posse tē adiuvāre?”

“Mē parvā,” inquit, “patrem in ancillā reperiendā adiūvistī, itaque putāvī tē et alia reperīre posse.”

Clōdius exclāmāvit: “Patrem tuum! Filia es Terentiī Aētīi! Tē mē iam ante vīdisse sciēbam! Profectō tē in pūgiōne reperiendō adiuvāre possum. Rēs enim reperīre optimē sciō. Nihil est quod reperīre nōn possim.”

“Ain’ tū?” respondit Terentia. “Num repperistī ancillam patris? Eam enim nusquam vīdī postea.”

“Immō,” inquit, “repperī...”

“Optimē,” statim respondit Terentia.

“...mortuam,” perrēxit Clōdius, “in Tiberī.”

Ad quod Terentia: “Quid ais?”

Tum Clōdius, “Repperī tamen,” inquit. “Per hōs oculōs tibi iūrō!”

CAPITULUM OCTĀVUM

TERENTIA VIRUM PARVUM magnō ventre iam diū intuēbātur, cum fēmina parva conclāve intrāvit. Duo pōcula vīnī sēcum ferēbat. Ad Terentiam accessit et vīnum ante eam in mēnsā posuit. Tum ad Clōdium iit et vīnum ante eum posuit et ē conclāvī ēgressa est.

Clōdius pōculum vīnī statim sūmpsit et bibit. Tum pōculō positō Terentiam intuitus est.

“Sī rēctē intellēxī,” inquit, “pūgiōnem tuam recuperāre vīs.”

“Volō,” respondit illa.

Clōdius Terentiae adnuit et Terentia dē nocte proximā nārrāvit. Clōdius manum ventrī magnō imposuit et Terentiae nārrantī, “Quid,” inquit, “malum, nārrās?! Fuistīne in caupōnā ‘Asinā’?! Est periculōsissima. Scelestī solī ad eam eunt. Quid tū ibi noctū agēbās?”

“Vinum,” inquit Terentia, “bibēbam.”

Clōdius adnuēbat sed Terentiam mentītam esse putābat. Cōgitābat sēcum Clōdius: *Noctū forīs Rōmae esse periculōsum est! Nēmō est quī nesciat! Et Terentiam—cuius patrem dīvitē ōlim adiūvī—ad scelestam illam caupōnam iisse, ut vinum biberet! Etiam sōle lūcente ad eam caupōnam ire periculōsum est. Quid mihi nārrāre nōn vult? Quid mē cēlat?*

Clōdiō sēcum sic cōgitante, Terentia tacuit. Clōdius pōculum vīnī rūsus sūmptum bibit. Tacitus paulisper sēdit dum tandem rogāvit: “Cūr pūgiōnem recuperāre vīs?”

“Rogās?!” inquit. “Pūgiōnem recuperāre volō quod meus est!”

“At pūgiō est tantum. Sunt aliī pūgiōnēs. Cūr hunc ipsum recuperāre vīs?”

Terentia irāta esse vidēbātur. Paulisper tacuit, tum: “Est pūgiō pulcherrimus. Est argenteus.”

“Pulchrum,” inquit Clōdius, “pūgiōnem tibi dare possum. Mihi multī sunt.”

Tum Terentia etiam irātor, “At meum,” inquit, “volō. Patris enim fuit. Prope nihil aliud quod eius fuit mihi restat. Mortuus enim est.”

“Male hercle,” inquit Clōdius, “nārrās, Terentia. Bonus fuit vir.”

Clōdius pōculō vīnī rūsus sūmptō sēcum cōgitāvit: *Haec plānē mentitur. Aliquid cēlat.*

CAPITULUM NŌNUM

TUM, “QUĀLIS EST?” inquit Clōdius.

“Quāle,” inquit Terentia, “est quid?”

“Pūgiō quem quaeris, quālis est?”

Subirāta, “Argenteus,” inquit, “ut iam tibi dīxī.”

“Intellegō,” inquit, “est argenteus, sed Terentia, multī sunt pūgiōnēs argenteī. Sī pūgiōnem reppererō, quī sciam tuusne sit?”

Cui illa: “Audī: Intuentī pūgiō meus vidētur lineās habere quae sōlī similēs lūcent. Adiuvābisne mē an nōn?”

“Faciam,” inquit Clōdius et pōculum vīnī rūsus sūmptit.

“Optimē!” inquit Terentia. “Sed dīc, quid amplius opus est tibi scīre?”

“Nihil amplius,” inquit Clōdius, “opus est mihi scīre,” et subito vinum sibi super tunicam imprūdēns effūdit.

“Clōdī,” inquit Terentia, “vīnum super tunicam tibi effūdistī.”

“Sciō,” inquit Clōdīus. “Licetne mihi tuum vinum bibere?”

Tum subridēns, “Abibō,” inquit Terentia.

Et Clodius: “Bene, ego pūgiōnem tuam quaeram.”

Tum Terentia: “Optimē! Valē!”


Terentia surrexit et ad iānuam sē convertit, et, “Parvīs erat,” inquit, “manibus.”

Ad hoc Clōdīus: “Quid? Quis?”

“Ille scelestus,” inquit Terentia, “quī mihi pūgiōnem abstulit, parvīs erat manibus. Hoc caupō dixit, sed nesciō adiuvetne.”

Ad quod Clōdīus: “Nesciō adiuvetne, sed meminerō. Valē!”

Terentia adnuit et ē conclāvī ēgressa est. Post sē Terentia Clōdium dē vīnō effūsō clāmantem audivit.



CAPITULUM DECIMUM

CUM TARENTIA ABIISSET, Clōdīus tunicam exiit quam in parvā et rubrā sellā posuit. Parvam fēminam ad sē vocāvit, sed fēmina nōn vēnit. Clōdīus irātus ē conclāvī flāvō conclāve rubrum intrāvit et ūnā ē iānuīs apertā clāmāvit: “Ursula! Ubi es? Accēde hūc! Ursula! Tunica mea maculās vīnī habet! Ego...immō, aliquis super tunicam vīnum effūdīt.”

Sed Ursula nōn respondit: Post iānuam quam Clōdīus aperuerat nōn erat. Etiam irātior proximam iānuam aperuit. Ibi Ursula vīnum ē magnō pōculō bibēbat. Suspexit in Clōdium et ita rogāvit: “Quid vīs?”

“Quid,” inquit Clōdīus, “malum, nōn respondēs mihi vocantī?”

Ursula nōn respondit sed Clōdīi ventrem intuēns rogāvit:

“Cūr venter tuus vīnī maculās habet?”

“Quid,” inquit Clōdius, “dixistī?”

“Cūr nūllam tunicam geris? Sic,” inquit Ursula, “forās ire nōn dēbēs. Quid enim hominēs dē tē dicent?”

“Vīnum,” inquit Clōdius, “imprūdēns effūdī.”

Subirāta, “Ain’ tū?” inquit Ursula. “Cūr pūram tunicam nōn induis?”

“Quod,” inquit Clōdius, “ubi sint pūrae tunicae, nesciō.”

Ursula ē conclāvī ēgressa cum pūrā tunicā mox rediit. Flāva erat.

“Flāvam,” inquit Clōdius, “nōn geram! Candidam volō!”


“At vīnum,” inquit Ursula, “super candidam effūdistī. Ubi eam posuistī?”

“In sellā iacet,” respondit Clōdius. “Sed cūr pōculum tuum maius est quam meum?”

Ursula Clōdium irātīs oculīs paulisper intuita est, tum, “Quod,” respondit, “semper vīnum imprūdēns effundis!”

“Plānē mentīris! Vīnum nēmō hercle melius bibere scit quam ego!”

Ursula tacuit et irāta tunicam sūmpsit, dum Clōdius pūram tunicam induit.



CAPITULUM UNDECIMUM

PŪRĀ TUNICĀ INDŪTUS Clōdius forās ēgressus est. Praeteriit stabulum equōrum et asinōrum plēnum. Per multās viās iit dum ad caupōnam ‘Asinam’ vēnit. Clōdius paulisper in viā circumspexit. Tum iānuā caupōnam intrāvit.

In magnum conclāve vēnit. Ad mēnsam vacuam accessit et cōnsēdit.

Ministrō, “Heus tū, accēde hūc! Vīnum!” clāmāvit.

Ad mēnsam sedēns, circumspexit. In conclāvī trēs virī sedēbant quī omnēs ante sē magna vīnī pōcula habēbant. Minister ad Clōdium accessit et magnum pōculum ante eum quoque posuit.

Clōdius ministrum ita rogāvit: “Hāc nocte fēmina cum ancillā suā hīc fuit. Vīnum illī super tunicam effūsum est, tum

pūgiō illi ablātus est. Vidistīne adulēscēntem quī haec fēcit?”

Minister adnuit.

“Hunc adulēscēntem, nōstīn’?”

Minister adnuit sed nihil respondit. Clōdius eum intuitus est. Tum sacculum prōmpsit ex quō apertō nummum prōmpsit. Nummum ministrō dedit. Minister subrīsīt et nummō sūmptō abiit. Clōdius irātus ministrō clāmāvit: “Accēde hūc, sceleste! Hoc quod te rogō mihi respondē!”

Caupō, vir capillō nigrō, quī ānulōs aureōs gerēbat, statim accessit.

“Omnia bene?”

“Rogās?! Nōn!” respondit Clōdius. “Aliquid ministrum tuum scelestum rogāvī, tum nummō sūmptō nōn respondit sed adnuit et tacitus abiit. Abeat in malam rem!”

“Graecus,” inquit caupō, “est; nōn multa Latīnē dīcere scit. Latīnē nōn loquitur sed fortasse ego tē adiuvāre possum. Mihi nōmen est Oeneus et haec mea est caupōna.”

“Mihi,” inquit Clōdius, “nōmen est Q. Clōdius Crēscēns,” et nummōs ē sacculō prōmptōs in mēnsā posuit.

Oeneus nummōs magnīs oculīs intuēns statim sūmptit. Clōdius ea quae scīre volēbat rogāvit. Oeneus adnuit et tandem respondit: “Nesciō quis sit ille adulēscēns capillō nigrō quem fugientem fēmina secūta est, sed hūc saepe venit. Tunicās flāvās gerere solet. Nōn hercle placent tunicae flāvae.”

Clōdius nummum alterum in mēnsā posuit.

“In mentem modo vēnit: Adulēscēntem quem quaeris,” inquit caupō, “ad Portam Capēnam ōlim vīdī, putō. Visne amplius vīnī?”

“Volō hercle!” exclāmāvit Clōdius.


Oeneus ministrum Graecum ad sē vocāvit. Minister ad

Clōdii mēnsam accessit et, pōculō vīnī plēnō positō, subrīsīt et ā mēnsā abiit. Clōdius pōculum sūmptit et ex eō bibit. Ad Portam Capēnam ire nōlēbat. Nōn longē ā caupōnā ‘Asinā’ aberat sed Porta Capēna eī nōn placēbat; tam multī hominēs ad portam Capēnam erant, et amplius vīnī volēbat. Itaque mānsit et vīnum bibit.

PAULŌ POST...

Pōculum posuit, sed mēnsa nōn iam erat ubi paulō ante fuerat, et Clōdius imprūdēns omne vīnum sibi super ventrem effūdit.

Exclāmāvit: “Ō mēnsa scelestissima, abīn’ in malam rem?” Surrēxit dē sellā et ē caupōnā irātus ēgressus est.



CAPITULUM DUODECIMUM

IANUĀ ĒGRESSUS CLŌDIUS ventre suō magnō offendit
adulēscēntem parietī similem, tantus erat. Clōdius cecidit.
Adulēscēns magnus nōn cōstitit sed perrēxit.

Clōdius exclāmāvit: "Abī in malam rem, sceleste!"

Tum adulēscēntem intuitus est. Capillō nigrō erat et tuni-
cam flāvam gerēbat!

Clōdius surrēxit, sed, cum multum vīnī bibisset, vix sur-
gere poterat.

Adulēscēntī abeuntī, "Manē!" clāmāvit.

Adulēscēns sē nōn convertit sed perrēxit. Celeriter ībat.
Celerius quam Clōdius currēbat. Aliam post aliam viam
ingressus est. Clōdius secūtus est. Circum Maximum pra-
eteriit, tum aliam viam ingressus est. Clōdius secūtus est.

Subitō Clōdius rūrsus cecidit. Adulēscēns pugnō eum

percusserat. Clōdium humī iacentem intuitus est et irātīs
oculīs, "Quid, malum," inquit, "mē vīs? Cūr mē sequeris?"

Pūgiōnem Clōdiō ad oculum tenēbat. Clōdius manūs
sibi ventrī imposuit ubi pugnō percussus erat. Pallidus erat.

"Quaerō," inquit Clōdius, "adulēscēntem. Tē esse illum
putābam."

"Age, intuēre mē!" inquit, "Sumne ille quem quaeris?
Intuēre mē, inquam!"

"Nōn putō."

Cui adulēscēns: "Quī scīs?"

"Tam," inquit Clōdius, "magnīs es manibus!"

Adulēscēns subrīsīt. Pūgiōne positō Clōdiō manum dedit.

CAPITULUM TERTIUM DECIMUM

ADULĒSCĒNS ABIIT. CLŌDIUS manibus ventrī impositīs in viā stābat. Cum venter maximē dolēret, pūgiōnem quaerere nōn iam volēbat. Ad Portam Capēnam ire nōlēbat. Circumspexit. Locum bene nōverat. Cum nōn longē ā Portā Capēnā iam esset, eō perrēxit. Ubi ad Viam Appiam vēnit, cōstitit.

Multī aderant hominēs, multī mendicī. Mendicī placēbant; ipse enim mendicus ōlim fuerat. Illud autem nōn placēbat quod tam multī eōdem locō erant et quod mendicī quī ad Portam Capēnam erant ūnum tantum deum esse putābant. Ūnum deum! Intellegere nōn poterat cūr Iuppiter aut Mārs eōs nōn percussisset. Tum in mentem vēnit Iovem et Martem hoc iam fēcisse—mendicī enim erant. Quamquam ipse fortasse speciem mendicī praeberē solēbat, pūriōrēs tamen

tunicās gerēbat quam mendicī. Statim ventrem magnum et tunicam flāvam intuitus est. Rubra erat maculīs vīnī. Iam nōn multō pūrior erat quam mendicī, sed pūrior esse solēbat.

Clōdius ad Portam Capēnam adulēscēntem quī pūgiōnem abstulerat diū oculīs quaesivit. Multōs hominēs pulchrōs, multōs hominēs capillō nigrō, multōs hominēs tunicā flāvā, multōs hominēs parvīs manibus vīdit sed nēminem vīdit flāvā tunicā indūtum, capillō nigrō, manibus parvīs.

Paulō post ad senem accessit mendicum ad Viam Appiam sedentem. Luxtā eum in viā cōsēdit et, “Salvē,” inquit, “solēsne hīc sedere?”

“Salvē et tū! Soleō,” inquit mendicus, “quid ad tē?”

Tum Clōdius: “Adulēscēntem quaerō quem ad Portam Capēnam venīre solēre audivī. Potesne mē adiuvāre?”

“Multī adulēscētēs,” respondit senex, “hūc veniunt. Quā est faciē?”


“Hic adulēscēns,” inquit Clōdius, “quem quaerō est pulcher, nigrō capillō et parvīs manibus. Vidistīne hominem eā faciē?”

“Saepe,” inquit senex, “hominem eā faciē vīdī sed nesciō sitne idem quem tū quaeris. Multī eā faciē sunt. Cūr eum quaeris?”

“Pūgiōnem,” inquit Clōdius, “fēminae abstulit.”

“Nihil hercle,” respondit senex, “dē adulēscēnte sciō quī pūgiōnem fēminae abstulerit. Audivī autem aliquem Augustō ipsī pūgiōnem abstulisse!”

“Hoc scīre,” inquit Clōdius, “mē nōn multum adiuvat. Bene autem fēcistī quod mē adiuvāre cōnātus es.” Nummum ē sacculō suō prōmptum senī dedit et dē viā surrēxit.



“Valē!” inquit Clōdius.

Ā Portā Capēnā abiit et domum, quae iuxtā stabulum erat, rediit. Iam enim tenebrae erant et noctū Rōmae forīs esse nōlēbat, et maculam vīnī super ventrem habēbat.

Sēcum tum cōgitāvit: *Quid sī quis mē videat? Plānē mendicus esse videor!*

CAPITULUM QUĀRTUM DECIMUM

PROXIMŌ DIĒ CLŌDIUS domō ēgressus est. Nesciēbat ubi adulēscentem quaereret, itaque per viās nōn longē ā Caupōnā nōmine ‘Asinā’ ībat. Adulēscentem illum nigrō capillō reperire volēbat, sed illō ipsō diē omnēs Rōmae capillō nigrō esse vidēbantur. Clōdius ad Portam Capēnam rediit sed nōn diū ibi mānsit. Cum illō mendicō sene paulisper sēdit quī eōdem locō sedēbat quō proximō diē sēderat. “Nihil,” inquit senex, “novi vīdī.”

Clōdius diūtius quaerere nōlēbat. Calor magnus Rōmae iam erat. Sōl lūcēbat sed Clōdiō neque sōl neque calor placēbat. Sōl Rōmae semper lūcēbat et magnus calor semper erat. Neque ipsa urbs eī placēbat. Nimis multī hominēs erant.

Ad caupōnam nōmine ‘Asinam’ rediit. Iānuā apertā intrāvit. In caupōnā calor et tenebrae erant. Mēnsam vacuam cōspexit

ad quam accessit et cōnsēdit ut iānuam vidēret.

Ministrō vocātō, “Vīnum!” inquit, “vīnum volō!”

Minister adnuit et ā Clōdiō abiit. Latīnē nōn multum intellegēbat sed ‘vīnum’ plānē intellegēbat. Paulō post cum pōculō vīnī rediit quod in mēnsā ante Clōdium tacitus posuit.

Clōdius in caupōnā diū mānsit ut vīnum biberet et adulēscēntem exspectāret. Minister ad mēnsam eius saepe rediit ut Clōdiō amplius vīnī daret.

PAULŌ POST...

Cum Clōdius vīnum rŭrsus poscēbat, iānuā caupōnae aperta est. Iānuā intrāvit adulēscēns pulcher, longus, capillō nigrō. Tunicam flāvam gerēbat quae in tenebrīs vidēbātur esse aurea.

Adulēscēns per conclāve tacitum iit et ad mēnsam iuxtā Clōdium cōnsēdit. Vīnum poposcit et, ubi pōculum manū sŭmpsit ut biberet, Clōdius eum intuitus est: Parvīs erat manibus.

CAPITULUM
QUĪNTUM DECIMUM

CLŌDIUS AD MĒNSAM iuxtā adulēscēntem pulchrum sedēbat. Cum autem proximus adulēscēntī sedēret, eum intuērī nōlēbat, itaque suum vīnī pōculum intuitus est. Sed nimis diū pōculum intuitus est. Oeneus enim caupō ad mēnsam eius mox accessit et, “Omnia,” rogāvit, “bene? Malumne est vīnum? Nihil hercle dē vīnō scīs! Hoc est optimum vīnum! Pater meus fēcit. Abī in malam rem cum tunicā tuā flāvā!”

Clōdius ē pōculō in Oeneum suspexit.

“Omnia,” inquit, “bene. Vīnum nōn malum est, immō optimum est. Cūr mihi hīc sedentī sic clāmās?”

“Subīrātus,” inquit Oeneus, “esse vidēbāris, nihil enim aliud iam diū intuēris quam pōculum tuum, quasi vīnum malum sit.”



“Nihil est, “respondit Clodius,” mēcum tacitus loquēbar.”

Cui Oeneus subrīdēns, “Cavē,” inquit, “cum homine malō loqueris.”

Oeneus nōn abiit sed ad mēnsam paulisper stetit et, “Ecce,” inquit, “adest ille quem quaeris. Proximus tibi sedet!”

Clōdius rŭrsus suscepit et: “Iam sciō.”

Caupō adnuit, tum Clōdius pōculō vīnī sūmptō bibere perrēxit. Oeneus nummīs ē mēnsā sūmptīs conversus abiit.

Cum prope nihil vīnī Clōdiō restābat, adulēscēns pulcher dē sellā surrēxit et abiit. Ubi ad iānuam vēnit, Clōdius quoque surrēxit. Vīnum quod restābat bibit et pōculō in mēnsā positō abiit ut adulēscēntem sequerētur.

Clōdius iānuā apertā forās ēgressus est. Circumspexit. Cum multī hominēs in viā essent, adulēscēntem nōn vidēbat. Tum eum subitō paulō longius cōspexit. Clōdius eum statim secūtus est. Diū eum secūtus est. Ā caupōnā ‘Asinā’ celeriter abībant. Clōdius adulēscēntem sequēbātur sed nesciēbat ubi Rōmae essent. Adulēscēns enim viīs ībat quibus Clōdius numquam ierat. Iam ingressī sunt parvam viam quae tam obscura erat ut iam nox esse vidērētur, quamquam diēs erat et sōl lūcēbat. Via hominibus et caupōnīs vacua erat.

Subitō adulēscēns conversus rogāvit: “Heus tū! Sequerisne mē?”

Adulēscēns irātus Clōdium intuēbātur; Clōdius nōn respondit sed cōnstitit.

Rŭrsus adulēscēns: “Heus, heus, tibi dīcō! Sequerisne mē?”

Vidē quid agās!”

Clōdius adnuit.

“Quid, malum,” inquit adulēscēns, “mē vīs?”
“Pūgiōnem,” inquit Clōdius, “pūgiōnem volō.”

Adulēscēns Clōdium intuēns pūgiōnem prōmpsit et eum prae sē tenēns, “Huncine,” rogāvit, “pūgiōnem?”

Clōdius adnuit.

“Cūr,” inquit adulēscēns, “pūgiōnem meum vīs?”
“Nōn,” inquit Clōdius, “est tuus.”

At ille, “Immō,” inquit, “est. Cūr eum vīs?”

Ad hoc Clōdius, “Fēmina,” inquit, “cui pūgiōnem abstulisti, eum recuperāre vult: Fuit enim patris eius pūgiō.”

Tum adulēscēns capillō nigrō, “Hunc pūgiōnem,” inquit, “nūllī fēminae abstulī!”

“Immō,” inquit Clōdius, “fēcisti, et fēmina nunc eum recuperāre vult.”

Ad haec adulēscēns irātus, “Nōn,” inquit, “hercle habēbit. Nōn est eius pūgiō; neque tuus neque eius est. Meus est! Pater illius scelestae fēminae mihi abstulit. Nēmō mihi eum rŭrsus auferet!”

Sē convertit ut abiret.

Tum Clōdius adulēscēntī abeuntī clāmāns, “Quis,” inquit, “es? Hoc quod rogō respondē!”

Adulēscēns abire perrēxit neque respondit.

Clōdius irātus, “Dā,” clāmāvit, “mihi pūgiōnem!”

At adulēscēns, “Numquam,” respondit neque sē convertit.

Clōdius lapide dē viā sūmptō caput adulēscēntī percussit.

CAPITULUM SEXTUM DECIMUM

CLŌDIUS ADULĒSCENTEM NŌN vehementer percussit. Adulĕscĕns conversus Clŏdium pugnŏ percussit. Lapis Clŏdiŏ ē manū cecidit. Adulĕscĕns eum rŭrsus pugnŏ percussit. Clŏdius irātus exclāmāvit et adulĕscĕntī caput pugnŏ vehementer percussit. Tum adulĕscĕns Clŏdiŏ ventrem percussit eā manū quā pūgiŏnem tenēbat. Clŏdius pūgiŏnemprehendit eumque manibus ad sē trāxit.

“Dā,” clāmāvit Clŏdius, “mihi pūgiŏnem!”

Ad hoc, “Nŏn est tuus!” inquit alter, “Mitte pūgiŏnem!”

Et Clŏdius et adulĕscĕns pūgiŏnem manibus suīs tenēbant.

Tum vir magnus capillŏ rubrŏ quī prope eŏs stābat subitŏ,
“Quid hoc,” inquit, “reī est? Cūr pugnātis?”

Clŏdius et adulĕscĕns nigrŏ capillŏ magnum virum intuitī sunt sed pūgiŏnem nŏn mīserunt. Tacēbant.

Tum magnus vir, “Nŏnne,” inquit, “tū es Clŏdius?”

“Sum,” inquit Clŏdius, “quid ad tē?”

“Ego sum C. Bombius Parvus, ille quem in patre reperiendŏ ōlim adiūvistī!”



Ad haec Clŏdius, pūgiŏne nŏn missŏ, “Salvĕ,” inquit, “Parve, in hīs tenebrīs nŏn vidī esse tē. Omnia bene? Pater bene valet?”

Tum, “Omnia,” respondit Parvus, “bene, pater valet. Cūr pugnātis?”

“Ecce,” inquit Clŏdius, “hic homŏ, adulĕscĕns scelestus, fĕminae pūgiŏnem abstulit, quem nunc recuperāre cŏnor, sed eum mittere nŏn vult.”

Ad haec Parvus: “Ain’? Itaque pergite! An vīs,” rogāvit, “mē tē adiuvāre?”

“Profectŏ,” inquit Clŏdius, “volŏ!”

C. Bombius Parvus accessit ut adulēscēntem prehenderet; sed is pūgiōne missō statim fūgit, nōlēbat enim cum Parvō, virō maximō, pugnāre.

Clōdius manūs suās intuitus est. Manibus pūgiōnem tenēbat, sed vidēre nōn poterat pūgiōnem esse argenteum, quod nimis cruentus erat. Clōdiō ē manibus tantum sanguinis iam fluēbat ut pūgiō esset ruber. In Parvum suspexit et, "Grātiās," inquit, "tibi agō quod mē adiūvistī, Parve."

"At nihil," inquit, "fēcī! Sed mihi nunc abeundum est."

Tum Clōdius, "Valē," inquit.

CAPITULUM SEPTIMUM DECIMUM

IĀNUĀ APERTĀ CLŌDIUS conclāve rubrum intrāvit. Clōdiō ē manibus sanguis fluēbat et tunica sanguine rubra erat. Tam rubra erat quam conclāve. Iānuam proximī conclāvis, conclāvis illius flāvī, aperuit et intrāvit. Tunicam exuit et in ūnā ē sellīs cōnsēdit. Tum pūgiōnem cruentum prōmpsit quem tunicā suā abstersit. Pūgiōne abtersō, manūs quoque abstersit.

Paulisper cōgitāvit.

Ē stabulō proximō equōs et asinōs audiēbat. Pūgiōnem argenteum intuēbātur sed, cum in tenebrīs sedēret, prope nihil vidēbat. Pūgiōne in mēnsā positō mox dormiēbat.



Ubi diēs vēnit, Clōdius sonitū equōrum excitātus est. Circumspectit. Tunicam cruentam in sellā vidit. Vidit etiam sibi sanguinem super ventrem esse. Surrēxit dē sellā et in proximum conclāve iit. Cum Clōdius ventre pūrō rediisset, pūram tunicam induit quae flāva erat, quamquam tunicae flāvae eī nullō modō placēbant. Cōgitāvit sēcum: *Cūr tandem duās tunicās flāvās habeō?* Tum forās ēgressus est ut circumspiceret.

Subitō, “Heus,” clāmāvit, “tū quī candidam tunicam geris! Tibi dīcō, accēde hūc!”

Parvus puer ad Clōdium statim accessit et in eum suspexit. “Terentiam,” inquit Clōdius, “fēminam quae hīc fuit, nōstīn’?”

Puer adnuit. Clōdius nummum ē sacculō prōmptum puerō dedit et, “Curre,” inquit, “ad Terentiam et nārrā mē patris dōnum repperisse.”

Puer parvus adnuit et nummō ē manū Clōdii sūmptō celerrimē abiit. Clōdius puerum currentem paulisper oculīs secūtus est, tum rūsus aedēs intrāvit. Ad sellam in quā proximā nocte dormiverat rediit et statim cōnsēdit. Tum clāmāvit: “Ursula, ubi es? Accēde hūc! Mihi vīnō opus est!”

Paulō post fēmina parva cum pōculō vīnī plēnō vēnit, quod in mēnsā ante Clōdium posuit.

“Cavē,” inquit Ursula, “pōculum plēnum est!”

Tum tunicā cruentā cōspectā, quae in alterā sellā iacēbat, irāta, “Quid, malum,” inquit, “fēcistī? Tunica tua maculās nunc vīnī, nunc sanguinis habet! Nōnne tibi melius est tunicās nōn gerere?”

Ursula respōnsum nōn exspectāvit sed tunicā sūmptā ē conclāvī irāta ēgressa est. Clōdius pōculō dē mēnsā sūmptō vīnum bibit. Pōculō positō pūgiōnem sumpsit quem proximā nocte in mēnsā posuerat. Pūgiōnem manibus prae sē

tenēns intuitus est; maculae sanguinis etiam cōspiciēbantur, quās Clōdius tunicā suā statim abstergere cōnātus est. Exclāmāvit irātus ubi in mentem vēnit hanc quoque tunicam iam maculās habere! Sēcum cōgitāvit: *Fortasse Ursula rēctē dixit. Fortasse melius est mihi tunicās nōn gerere...*

Pūgiōnem quem absterserat intuitus est. Pūgiō in sōle lūcēbat. Sed restābant parvae maculae obscūrae et līnae, quās Clōdius diū intuitus, “At quid,” inquit, “hoc reī est?! Viārum, hercle, speciem hae maculae et līnae praebent!”



CAPITULUM DUODĒVICĒSIMUM

CLŌDIUS IN SELLĀ sedēns pūgiōnis parvās maculās et lineās intuēbātur, cum Terentia iānuā intrāvit. Clōdiō lineae illae speciem viārum praebere vidēbantur. Terentia post Clōdium tacita cōstitit.

Terentiā audītā Clōdius conversus statim dē sellā surrēxit. Pūgiōnem in mēnsā celeriter posuit et ad Terentiam accessit. “Salvē,” inquit, “quam celeriter hūc vēnistī! Cōnsīde!”

Terentia in alterā sellā statim cōnsēdit et Clōdius in alterā. Clōdius pūgiōnem dē mēnsā sūmpsit, quem ante Terentiam tenēns, “Hunc pūgiōnem,” inquit, “argenteum repperī. Tuusne hic est?”

Terentia pūgiōnem magnīs oculīs intuita est.

“Meus est,” inquit, “hic pūgiō. Grātiās, Clōdī, tibi agō quod eum repperisti! Nihil mihi est quod tibi dem sed tibi

maximam grātiām habeō.”

Pūgiōne sūmptō Terentia dē sellā surrēxit ut abīret ubi Clōdius, “Adulēscēns,” inquit, “quī eum tibi abstulit, mēcum pugnāvit.”

“Male nārrās!” inquit Terentia.

Tum Clōdius: “Ille nōlēbat tē pūgiōnem recuperāre. Scīsne, Terentia, cūr pūgiōnem velit?”

“Nesciō,” respondit Terentia.

Tum Clōdius: “Scīsne quis sit?”

Terentia subīrāta ita respondit: “Rogās?! Iam tibi dixī mē nescīre quis esset. Cūr idem rūsus rogās?”

At Clōdius, “Tē rogō,” inquit, “quod putō illum adulēscēntem scīre quis tū sīs.”

Terentia tacuit.

Hīc Clōdius: “Quid hae maculae, quae in pūgiōne sunt, significant?” Terentiam intuitus est.

Terentia, antequam sē convertit, “Tibi maculae,” inquit, “in tunicā sunt. Quid illae significant?”

At Clōdius, “Et mihi,” inquit, “in sōle illae lineae speciem viārum videntur praebere.”

Terentia ā Clōdiō conversa paulisper tacita stetit.

Tum, “Lineae,” inquit, “nihil significant,” et iānuā apertā celeriter ēgressa est.



Clōdius in sellā paulisper tacitus mānsit, tum dē eā surrēxit et Terentiam est secūtus sēcum sic cōgitāns: *Sciō Terentiam*

mihi mentītam esse: Plānē aliquid cēlat. Quid significārent lineae, Clōdius quoque scīre volēbat. Itaque eam secūtus est.

Forās ēgressus eam abeuntem vīdit. Eam tacitus secūtus est. Mox Terentia in viā cōstitit, et circumspexit. Clōdius statim sē cēlāvit, nē cōspicerētur. Terentia eādem viā perrēxit. Trāns viam euntem Clōdius longē secūtus est. Tandem Terentia ante caupōnam cōstitit. Iānuam intuita est. Tum ingressa est. Nōn multō post ēgressa domum suam iit. Clōdius secūtus prope domum Terentiae forīs exspectāvit.

Clōdius scīre volēbat cūr Terentia illum pūgiōnem argent-eum vellet. Tacitus sēcum cōgitābat pūgiōnem pulchrum esse et argenteum, sed pūgiōnem esse tantum. Clōdius respōnsum volēbat. Volēbat scīre quid Terentia cēlāret, quid lineae pūgiōnis significārent.

Terentia illō diē rūsus domō ēgressa non est. Nox vēnit. Clōdius nusquam abiit. Ante Terentiae aedēs exspectāvit.

CAPITULUM ŪNDĒVICĒSIMUM

TERENTIA IN LECTŌ sedēbat. Nox erat plēna sed nōn dormiēbat. Nōn poterat dormire, quod dē pūgiōne multum cōgitābat quem prae sē tenēbat.

Pūgiōnem in tenebrīs intuēns sēcum cōgitābat: *Quid nunc faciam? Patris pūgiōnem recuperāvī; quid eō faciam? Pater dixit eum ad aliquid ductūrum esse, sed mortuus est antequam diceret ad quid dūceret. Quid faciam?*


Terentia pūgiōnem convertit et eum diū intuita est. Parvās līneās quās in pūgiōne esse sciēbat in tenebrīs vidēre nōn poterat. *“In sōle illae līneae speciem viārum videntur praebēre.”* Sic Clōdius dixerat. Līneās pūgiōnis rūsus quaesīvit: *Fortasse Clōdius rēctē dixit...*

Pūgiōne positō dormitum iit. Opus erat eī pūgiōnem in sōle intuērī.



Terentia sōle et sonitū viae excitāta est. Ubi surrēxit, pūgiōnem prōmpsit, et eum in sōle tenēbat. Līneae in sōle iam cōspiciēbantur. Plānē viārum speciem praebēbant! Līneās intuēbātur ut vidēret quae viae essent, cum subitō, “At,” exclāmāvit, “Circī Maximī speciēs hīc praebētur, et hīc Tiberis, itaque...Fortasse errō, sed...Dōrippa!! Ubi es? Accēde hūc! Affer tunicam pūram!”

Terentia celeriter surrēxit et forās ēgressa est.



CAPITULUM VĪCĒSIMUM

PROXIMŌ DIĒ CLŌDIUS Terentiam domō ēgressam sequī perrēxit. Terentia diū iisdem viīs quibus solēbat iit sed subitō trāns Forum Rōmānum iit. Cum in medium forum vēnisset, pūgiōnem prōmpsit, quem diū intuita est. Circumspexit. Tum conversa ingressa est viam tacitam et obscuram quae ad Subūram ferēbat.

Clōdius secūtus in tenebrīs sē cēlāvit nē ab eā cōspicerētur. Subitō aliquem ante eam in viā stāre cōspexit: Erat adulēscēns capillō nigrō quōcum ipse pugnāverat et cui pūgiōnem abstulerat. Clōdius eōs loquentēs audīvit:

“Mīsistī,” inquit adulēscēns, “scelesta, hominem magnō ventre quī mē sequerētur, quī mihi pūgiōnem auferret.”

Terentia adnuit et, “Mīsī,” inquit, “ipsa enim tē sequī nōlūi.”

Tum adulēscēns ita respondit: “Ille homō magnō ventre

mihi pūgiōnem abstulit; nōne eum tibi post dedit? Dā mihi!”

“Nōn,” inquit, “faciam. Tibi hunc pūgiōnem nōn dabō! Nōn est tuus!”

“Neque,” respondit adulēscēns, “tuus est, sed Brūtī pūgiō fuit.”

“Id,” inquit Terentia, “bene sciō.”

“Et Brūtus pater meus fuit!”

“Mentiris, sceleste!” exclāmāvit Terentia, “Filius Brūtī mortuus est!”

Cui adulēscēns, “Nōn,” inquit, “plānē vīvō! Dā mihi pūgiōnem meum, scelesta!”

At Terentia: “Numquam!”

Ad hoc adulēscēns: “Scīs Augustum hunc pūgiōnem domī suae habuisse et cūstōdēs eius pūgiōnem nunc quaerere ut eum recuperent.”

“Nēmō est,” inquit Terentia, “quī id nesciat, sed pūgiōnem et eum quī pūgiōnem Augustō abstulit quaerunt. Ego nōn abstulī, tū fēcistī. Nōn fēminam sed virum quaerunt. Tē, inquam, sceleste, quaerunt, nōn mē!”

“Nōn,” inquit adulēscēns, “sum scelestus. Augustus pūgiōnem habēre nōn dēbet.”

Tum illa: “At es scelestus; omnia nōbīs abstulistī. Omnia nostra nunc tū habēs: omne aurum, omnēs ancillās, aedēs, omnia, inquam, habēs! Quid ad haec est tibi pūgiō? Omnia enim nostra iam habēs!”

“Tam,” respondit, “scelesta es quam pater tuus, quī pūgiōnem mihi abstulit! Iam tacē et dā mihi pūgiōnem!”

“Numquam faciam, sceleste!” inquit Terentia, et gradū ad adulēscēntem factō eum pūgiōne percussit.

Adulēscēns nigrō capillō manūs ventrī imposuit. Sanguis eī

ē ventre fluēbat ut tunica eius sanguine rubra esset. Tantum sanguinis eī ē ventre fluēbat ut lapidēs viae tam rubrī essent quam adulēscēntis tunica. Terentia gradum ab adulēscēnte fēcit et eum intuita est cadentem. Sēcum cōgitāvit: *Hominem interfēcī*. Paulisper cruentum adulēscēntis ventrem, tunicam cruentam, lapidēs viae cruentōs intuita est. Tum perrēxit. neque sē convertit.



Clōdius in tenebrīs sē cēlābat. Viderat Terentiam adulēscēntī ventrem pūgiōne percutere. Clōdius sē in tenebrīs nōn mōverat. Iam Terentiam abeuntem, et ante aedēs quae iānuam nōn habēbant cōsistentem vīdit.

Terentia diū pūgiōnem, quem prae sē tenēbat, intuita est. Tum aedēs sine iānuā intuita est. Subitō aedēs pūgiōne vehementer percussit, eōdem modō quō paulō ante adulēscēntem pūgiōne percusserat.

Ē tenebrīs Clōdius longē vīdit iānuam in aedibus aperīrī. Aedēs intuēns cōgitāvit: *Nūlla iānuā ibi paulō ante fuit, sed nunc est! Quid hoc rei est? Unde vēnit?*

CAPITULUM ŪNUM ET VĪCĒSIMUM

TERENTIA IN CONCLĀVĪ parvō et tacitō erat. Pūgiōnem cruentum prae sē tenēbat; intuita est sanguinem adulēscentis quem modo pūgiōne percusserat. Pūgiōnem manū abstersit, sed illae parvae līnae nōn cōspiciēbantur, quod in sōle tantum lūcēbant.

Terentia hās līnēas pūgiōnis longē secūta erat, quae eam per viās Rōmae dūxerant, sed sine sōle nūllō modō adiuvābant. Līnae eam ad hās aedēs dūxerant, sed Terentiae iam quaerendum erat.

Circumspexit: Conclāve erat vacuum. Parietēs, quī rubrī erant, intuita est. Ūnus ē parietibus maculam nigram habēbat, ē quā līnae aureae currēbant, quae sōlī similēs lūcēbant. Quam cum Terentia diū intuita esset, subrīsīt et pūgiōnem rūsus prōmpsit. Mediam maculam pūgiōne percussit.

Gradum ā pariete fēcit. Parietem intuita est: Nihil. Conclāve erat tacitum. Terentia ad parietem rūsus accessit. Pūgiōnem ē maculā parietis trāxit, quem prae sē tenēs intuita est. Pūgiōne conversō parietem rūsus percussit et ā pariete gradum celeriter fēcit. Pūgiōnem et maculam cum suīs līnēis intuēbātur, cum sonitum ē pariete audīvit. Subitō ante Terentiam pariēs similis iānuae apertus est.



Erat aliquid post rubrum parietem in quō macula et līnae aureae cōspiciēbantur. Aliquid lūcēbat. Terentia īspexit. Conclāve aurī plēnum erat. Terentia subrīdēs parietem ingressa est. Tantum aurī numquam vīderat! “Grātiās tibi agō, mī pater! Hoc aurum Brūtī esse dēbet, quod hīc cēlāvit antequam Caesarem pūgiōne percussit. Hōc aurō bene vivere poterō, ut ego et pater ōlim fēcimus!”

Cōnsēdit ut manūs aurō impōneret. Terentia subitō in faciem cecidit.

CAPITULUM ALTERUM ET VĪCĒSIMUM


PAULŌ ANTE...

DUM TERENCE IN aedibus sine iānuā est, Clōdīus accessit ad adulēscētem quī dīxerat sē esse Brūtī filium. In viā cruentus iacēbat. Multum sanguinis erat. Media via sanguine rubra erat. Clōdīus sēcum cōgitāvit: *Brūtī et Porciae filium iam diū mortuum esse putābam. Vehementer errāvī. Omnēs vehementer errāvimus! Sed nunc plānē mortuus est.*

Clōdīus accessit et cōnsēdit iuxtā adulēscētem ut vidēret num mortuus esset. Nōn erat: Eōdem enim tempore quō Clōdīus cōnsēdit, Brūtī filius eī caput lapide percussit. Clōdīus cecidit.

Brūtī filius surrēxit. Irātissimus erat quod ā Terentiā pūgiōne percussus erat. Alterā manū ventrī impositā, alterā

LATINITIUM



manū lapidem quō Clōdīum percusserat etiam tenēbat. Aedēs sine iānuā celeriter intrāvit ut Terentiā reperiret. Eē conclāvī proximō paulisper audīvit illam sēcum loquentem. Tum tacitus ad eam accessit et eī caput lapide vehementer percussit.

“Meum est,” exclāmāvit, “hoc aurum.”

Terentia humī ante eum cruenta iacēbat.

“Patrem habēre mihi nōn licuit. Mortuus iam diū est: Patre mortuō nihil aliud habeō quam hoc aurum. Hoc aurum est meum!”

Terentia nōn respondit. Tacita humī iacēbat. Capillus eius ruber erat. Ruber erat sanguine capitis. Adulēscēns eam nōn intūitus est. Nōn vīdit sanguinem eī ē capite fluere. Aurum solum vīdit quod ante oculōs erat.

Adulēscēns forās fūgit in viam parvam et obscūram. Cucurrit ad Forum Rōmānum. Ibi hominem cum plaustrō cōspexit. Tunicam hominis statimprehendit et, “Plaustrum,” exclāmāvit, “et asinum tuum volō!”

“Nōn,” respondit, “hercle, sceleste, tibi dabō! Mihi enim iīs opus est.”

Cui adulēscēns, “Nummōs,” inquit, “tibi dabō, sī mihi asinum et plaustrum dederis.”

“Nōn dabō!” respondit vir, “Plaustrō meō mihi opus est.”

Brūtī filius nummōs aureōs prōmpsit et ante oculōs virī tenēns, “Et,” inquit, “tunicam tuam volō.”

Vir aurō cōspectō tacitus adnuit et tunicam exuit. Eam in plastrō posuit quod reliquit et cum nummīs aureīs statim abiit. Brūtī filius cum novō plastrō ad viam parvam et obscūram et ad conclāve aurī plēnum celeriter rediit. Aurum in plastrō celeriter posuit. Tum tunicam aurō imposuit nē quis malus reperire posset aurum. Terentiam intuērī nōlēbat quae humī capillō cruentō etiam iacēbat. Eam in conclāvī iam vacuō humī iacentem reliquit.

CAPITULUM TERTIUM ET VĪCĒSIMUM

CLŌDIUS SONITŪ PLAUSTRĪ quod praeteribat excitātus est. Humī iacēns circumspexit. Brūtī filium cum asinō et plastrō praetereuntem vīdit. Manum sibi capitī imposuit eō locō quem Brūtī filius lapide percusserat. Sanguis eī ē capite fluēbat. Caput eī multum dolēbat. Surrēxit.

Clōdius Brūtī filium aliam viam cum plastrō celeriter ingredientem vīdit, sed eum nōn est secūtus. Conversus aedēs sine iānuā intrāvit, ut vidēret quō Terentia abiisset.

In obscūrum conclāve vēnit. In pariete pūgiō etiam erat. Post parietem in proximō conclāvī Terentia cruentō capite humī iacēbat. Nihil aliud in conclāvī vacuō erat. Terentiae capillus iam cruentus erat. Sanguis eī ē capite fluēbat. Clōdius ad eam accessit et sēcum cōgitāvit: *Plānē mortua est! Tantum sanguinis est! Ō hominem scelestum quī eam interfēcerit!*

Celeriter ēgressus est, et quod multum sanguinis erat—
sanguis nūllō modō Clōdiō placēbat—et quod sēcum sic
cōgitābat: *Sī hīc mē vīderint, fortasse mē interfēcisse Terentiam
putābunt et mēprehendent!*

CAPITULUM QUĀRTUM ET VICĒSIMUM

ASINUS FĪLIUM BRŪTĪ et plaustrum cum aurō domum
eius trahēbat. Trāns Forum Rōmānum plaustrum
cum aurō trāxit ad caupōnam nōmine 'Asinam,' quae
nōn longē ā domō filiī Brūtī aberat.

Subitō Brūtī filiō in mentem vēnit pūgiōnis, illius pūgiō-
nis quō Brūtus Caesarem ōlim percusserat. In pariete aedium
etiam erat. Quamquam aurum iam habēbat et nōn iam eī
opus erat pūgiōne, tamen eum habēre volēbat. Conversō
plaustrō ad Forum Rōmānum rŭrsus iit.

Trāns forum Clōdium subitō cōspexit, hominem parvum
magnō ventre, capite cruentō cuius tunica multās maculās
habēbat. Cōnstitit.


Trāns forum Clōdus Brūtī filiū vīdit. Hic quoque cōn-
stitit. Diū alter alterum intuentēs stetērunt. Nesciēbant quid

facerent.

Subitō trāns forum clāmātum est: “Heus tū!” Omnēs quī in forō erant tacuērunt et sē convertērunt.

Rūrsus clāmātum est: “Heus, heus, tibi dīcō, sceleste!” Clāmābat ūnus ē cūstōdibus Augustī. Cūstōs ad filium Brūtī celeriter accessit.

Clōdius trāns forum adulēscēntem ā cūstōdibus Augustī prehēdī et ā forō trahī vīdit. Ipse diū sē locō nōn mōvit. Nēmō sē locō mōvit. Hominēs in forō stantēs nōn ante sē locō mōvērunt quam cūstōdēs cum adulēscēntē abiērunt.



Clōdius plaustrum, in quō Brūtī filius sēderat, mediō forō relictum vīdit. Ad quod accessit. Īnspexit. Cōnsēdit. Surrēxit et rūrsus ĩnspexit. Cōnsēdit. Rūrsus surrēxit et rūrsus ĩnspexit. Plaustrum plēnum aurī erat!

CAPITULUM QUĪNTUM ET VICĒSIMUM

ASINUS CLŌDIUM ET plaustrum aurī plēnum domum Clōdii trahēbat. Trāns Forum Rōmānum plaustrum trāxit ad Portam Flūmentānam, domum Clōdii.

Clōdius iānuam domūs aperuit. In parvō conclāvī trēs hominēs quī barbam habēbant exspectābant. Ursula ex ūnā ē iānuīs ēgressa, “Trēs,” inquit, “hominēs tē iam diū exspectant.”

“Videō,” inquit Clōdius. Ad hominēs conversus subridēns, “Aliō,” inquit, “diē, redīte, tempus nunc nōn habeo.”

Duo hominēs abiērunt sed tertius mānsit. Clōdius irātus, “Nōn,” inquit, “tempus habeo. Audīn’? Aliō diē redī!”

Tum homō, “Audiō,” inquit, “sed hūc vēnī quod Augustus mē mīsit. Cūstōs eius sum et adulēscēntem quaerō pulchrum capillō nigrō. Hic enim adulēscēns aliquid Augustō abstulit, quod Augustus nunc recuperāre vult. Oeneus caupō dixit tē

quoque adulēscēntem capillō nigrō quaerere. Itaque tē nunc rogō: Repperistīne eum?”

Clōdius pallidus erat. “Oeneus,” respondit, “est homō scelestus!”

Cui cūstōs, “Sciō,” inquit, “vidistīne adulēscēntem?”

“Vidī. Trēs enim cūstōdēs Augustī adulēscēntem eā faciē in Forō Rōmānōprehendērunt. Ā Forō Rōmānō modo vēni. Hīs oculīs vidī.”

“Ain’ tū?” inquit cūstōs Augustī.

“Aiō. Eum ā Forō Rōmānō manibus trāxērunt.”

“Bene,” inquit Augustī cūstōs, “nārrās. Itaque abībō. Ūnum autem aliud tē rogābō.”

Cui Clōdius, “Rogā,” inquit, “ūnum.”

“Sanguis,” inquit, “tibi ē capite fluit. Cūr?”

“Quod,” inquit, “in capite est sanguis... et aliquis mē lapide percussit.”

Tum cūstōs: “Rōma est periculōsa.”

“Est hercle ita ut dīcis, cavē!” respondit Clōdius.

“Valē!” inquit cūstōs.

Augustī cūstōs conversus abiit. Iānuā clausā Clōdius conclāve rubrum intrāvit.

“Ursula! Accēde hūc!” clāmāvit.

Ursula in conclāve celeriter vēnit.

“Quid,” rogāvit, “vīs?”

“Ī,” respondit Clōdius, “ad stabulum proximum, nōbīs est statim abeundum. Ubi sunt tunicae meae?”

“Tunicae,” inquit, “tuae hīc sunt. Quō ibimus?”

“Nōn,” respondit, “habeō tempus nārrandī, sed nunc eundum est. Nunc ipsum! Quam celerrimē! Age, curre ad stabulum proximum et dīc Clōdium raedam nunc velle!

Tum hūc celeriter redī et prōme tunicās et vīnum; Rōmā enim nōbīs ēgrediendum est.”

“Num raedam tantum,” rogāvit Ursula, “vīs? Nōn equum neque asinum?”

Īrātus Clōdius, “Immō,” inquit, “cōgitā! Duōbus equīs nōbīs opus est! An vīs mē raedam trahere? Abī nunciā, age! Quid stās? Abī!”

Ursula subridēns ita rogāvit: “Asinō nōn opus est?”

“Nōn tacēs?” inquit Clōdius, “Nihil opus est asinō! Opus est raedā et duōbus equīs. Tantum est. Ī nunciā!”

Cum ad iānuam iret sēcum tacita cōgitābat: *Profectō nihil opus est asinō, cum tantus iam domī sit.*

CAPITULUM SEXTUM ET VĪCĒSIMUM

RAEDA CELERITER ĪBAT. Clōdius et Ursula circumspiciēbant ē raedā quae duōbus equīs trahēbātur. Per Portam Flūmentānam, trāns Pontem Aemilium iērunt et Viam Aurēliam ingressī sunt.

Tum Clōdius sēcum cōgitāvit: *Numquam Rōmam rūsus vidēbō! Quod nōn doleō. Rōma enim mihi nōn multum placet, tantus calor est et tam multī sunt hominēs scelestī! Vehementer autem doleō quod Terentia mortua est et quod eam in conclāvī iacentem reliquī. Plānē scelestus sum. Vehementer errāvī.*

Cōnātus est dormīre, proximīs enim noctibus nōn multum dormīverat, sed vix Clōdius oculōs clauserat cum Ursula, “Quō,” rogāvit, “īmus?”

“Nōn tacēs?” respondit Clōdius. “Mihi dormiendum est.”

Tum Ursula: “Cūr, inquam, omnia nostra reliquimus?”

“Aurum et error,” respondit. “Mihi dormiendum est.”

“Aurum et error.” Quid,” inquit, “malum, mihi nārrās? Quid hoc significat? Quid? Estne periculōsum nōbīs Rōmae manēre? Cūr scelestīs similēs fugimus?”

“Nōn tacēs?” inquit Clōdius.

“Quid,” inquit Ursula, “fēcistī?! Cūr tam subitō Rōmā ēgressī sumus?”

Clōdius sacculum prōmptum ante oculōs Ursulae aperuit. Plēnus erat aurī quod in sōle lūcēbat.

“Unde,” rogāvit, “hoc aurum habēs?”

“Nōn,” inquit, “hercle, dīcam.”

“Clōdī...”

“Scīre,” inquit, “nōn vīs.”

Tum Ursula: “Multumne aurī habēs?”

“Plaustrum,” inquit, “quod attulī, plēnum aurī erat, quod omne nōbīscum nunc habēmus. Longē ībimus. Longē ab urbe Rōmā ībimus: Lutetiam ībimus. Tacē nunciam, mea Ursula, mihi dormiendum est.”

“Ubi,” rogāvit Ursula, “Lutetia est?”

“Longē,” inquit, “ab urbe Rōmā; in Galliā.”

“In Galliam īmus?! At ibi frīgus est.”

“Nōn tacēs?” inquit Clōdius.

Ursula tacita adnuit. Nihil amplius rogāvit. Clōdius in raedā aurī plēnā mox dormiēbat.

CAPITULUM SEPTIMUM ET VĪCĒSIMUM

POST MULTŌS DIĒS et noctēs et longissimam viam Clōdius et Ursula cum aurō Lutetiam intrāvērunt. Sōle lūcente Clōdius subrīdēns Ursulae, “Iam,” inquit, “Ursula, in Galliā, Lutetiae sumus! Brūtī aurō ut Caesar ipse vīvere poterimus!”

Clōdius ē raedā dēscendit. Subrīsīt sed nōn diū: Ante oculōs nōn Lutetiam, ante sē Terentiam irātissimam vīdit.

“Dī Bonī!” exclāmāvit, “Quid, malum, hoc reī est? At mortua es! Tē cruentam humī iacēre vīdī!”

Irāta, “Salvē,” inquit, “Clōdī!” et eum pūgiōne vehementer percussit. “Sīc eat quicumque homō mihi aurum auferet!”

Clōdius in faciem cecidit et Terentia ad raedam eius accessit. Ursulae in raedā etiam sedentī, “Aurum,” inquit Terentia, “meum abstulit. Mihi aurō opus est. Londīnium ire volō.”

Ursula tacēbat. Terentia prae sē pūgiōnem cruentum manū tenēns sēcum loquēbātur: “Pater dīcēbat hominēs Londīnī esse bonōs—quamquam barbam habent—nōn esse scelestōs, quālēs Rōmae omnēs sunt. Aurō Brūtī mihi opus est, ut dīves vīvam! Nēmō enim mē nōvit, nēmō mē quaerit, quod Augustī cūstōdēs adulēscēntem Rōmae iamprehendērunt. Hunc pūgiōnem numquam reperient neque aurum ad quod dūxit!”

Terentia parvam fēminam in raedā sedentem intuita est. Tum sacculum aurī plēnum prōmptum Ursulae dedit.

“Clōdius,” inquit Terentia, “mē ad aurum sequī nōn dēbuit. Sed sūme hunc sacculum et abī! Mē numquam vīdistī. Audīn’?”

Ursula tacuit et sacculum aurī plēnum sūmpsit, ē raedā dēscendit, et ā Terentiā, ā raedā, ā Clōdiō cruentō fūgit. Nōn circumspexit. Celeriter cucurrit ut ā Terentiā longē abīret.



CAPITULUM DUODETRICESIMUM

URSULA CURRĒBAT. DIĒS Lutetiae erat et Ursula per parvās urbis viās currēbat. Ā Terentiā fugiēbat cum mediā viā cōstitit et paulisper sēcum cōgitāvit. Tum conversa ad Clōdium celeriter rediit.

Nōn longē ā raedā cōstitit et exspectāvit dum Terentiā in raedā cōsideret. Exspectāvit dum Terentiā viīs Lutetiae cum aurō abīret. Post sē Clōdium reliquit. Terentiā autem postea nusquam vīsa est.



Ursula ad Clōdium humī iacentem tandem accessit. Iuxtā Clōdium cōsēdit et eum paulisper intuita est. Manum

Clōdiō ventrī imposuit. Venter cruentus erat, sed ex eō sanguis nōn iam fluēbat.

“Clōdī?” inquit Ursula.

Clōdīus oculīs apertīs in eam suspexit. Ursula subrīsīt.

“Ō mī Clōdī,” inquit, “nunc tunica tua maculās rūrsus habēt.”

Clōdīus subrīdēns, “Iam tibi dixī,” inquit, “tunicae flāvae mihi nōn placent.”

· FĪNIS ·

